

Messadi pertuccont la cunvegna da prestaziun cun l'uniun Cinema Sil Plaz

Preziau signur president dil parlament
Stimadas parlamentarias, stimai parlamentararis

Dapi diesch onns enrihescha il Cinema Sil Plaz la veta culturala a Glion ed ella regiun. Il marcau da Glion da gliez temps ha stipulau cun l'uniun il 2010 ina cunvegna da prestaziun cun in sustegn annual da 30'000 francs. Igl onn 2019 ei la cunvegna da prestaziun spirada. Suenter ina fasa da transiziun duei tala vegnir renovada ussa.

Purschida dil Cinema Sil Plaz

Els diesch onns dapi l'avertura dil Cinema Sil Plaz ell'antieriura fravgia a Glion ei tal daventaus ina plattafuorma per films, musica, teater, lecturas etc. Il Cinema ei sesviluppau tier in menaschi da cultura sur onn cun ina purschida professionala che carmala indigens e hosps. Al carisma contribuescha era l'architectura dil Cinema Sil Plaz ch'ei vegnida undrada cun plirs premis.

Purtaus vegn il Cinema dad in'uniun cun 400 commembras e commembers e rodund 80 voluntarias e voluntaris che tegnan en funcziun il menaschi da cultura duront lur temps liber. Quell'uniun ei gia vegnida fundada igl onn 1989 sco "Filmclub Ilanz" suenter ch'il kino Darms ha serrau sias portas, ed ha silsuent adina puspei organisau presentaziuns da films en divers provisoris.

Il program che vegn purschius sur igl entir onn (4 jamnas pausa da stad) mintgamai naven da mesjamna tochen sonda sera, cuntegn las suandontas purschidas:

Cinema:

- ca. 130 presentaziuns da films ad onn cun auturs e films mundials tscherni
- Ils films vegnan mussai en il lungatg original cun sottetels tudestgs.
- Il program da kino el Cinema Sil Plaz vegn sustenius finanzielmeins digl Uffeci federal per cultura, quei grazia alla diversitad dils lungatgs e dalla purschida.
- Team: 12 collaboraturas voluntarias e collaboraturs voluntaris
- Programmaziun: Ramun Capaul

Cinema kids:

- ca. 20 films per affons ad onn
- presentaziuns ina tochen duas gadas a meins la mesjamna suentermiezgi
- Team: 7 collaboraturas voluntarias e collaboraturs voluntaris
- Programmaziun: Maria Dunst

Cinema seniors:

- ca. 10 films ad onn
- presentaziuns ina gada a meins la gievgia suentermiezgi
- Team: 12 collaboraturas voluntarias e collaboraturs voluntaris
- Programmaziun: Marianne Giger

Tribuna:

- ca. 45 occurrenzas ad onn: concerts dils genres pop, rock, classica, musica populara e jazz; presentaziuns da teater; lecturas
- Team: 12 collaboraturas voluntarias e collaboraturs voluntaris
- Programmaziun: Corin Curschellas, Martina Cadonau, Gordian Blumenthal

Festival:

- Jazz Sil Plaz, festival da musica durant in'jamna il fevrer
- Programmaziun: Martina Cadonau, Gordian Blumenthal

Bar:

- menaschi da bar durant ils temps d'avertura
- Team: 40 collaboraturas voluntarias e collaboraturs voluntaris

Finanzas e valorisaziun

Il menaschi annual procura per ina sviolta da 200'000 francs. Da quels van rodund in quart sco gaschas als artists ord la regiun ed ordeifer la regiun. Ina gronda cumpart resta sco valorisaziun ella regiun, tier furniturs, gastronoms, hotels, mistergners etc. Plinavon ston adina puspei reservas vegnir fatgas per tener las installaziuns tecnicas caras per las presentaziuns da films sin in stan actual.

Las entradas secumponan da contribuziuns da commembers, entradas dad occurrenzas ed affittaziuns, reclama, contribuziuns dil maun public sco era donaziuns voluntarias e contribuziuns da persunas ed instituziuns privatas.

Svilup futur

Ils davos onns ha il Cinema Sil Plaz adina puspei engrondu sia purschida ed el vul era il futur sesviluppar. Las suandontas ideas sesanflan ella planisaziun:

Cinema ARGO

La fundaziun ARGO sesanfla il mument vid l'organisaziun d'ina nova purschida da structuradas dil gi che cumpeggia il sector da cultura per ses clients. La purschida da structura dil gi duei cuntener temas alternonts da tuttas spartas dalla cultura e possibilitar a persunas cun impediments spirtals da prender part tenor lur capacitads alla cultura. El Cinema Sil Plaz duei vegnir purschiu als clients in'experientscha culturala cinematografica e la confruntaziun cun il medium film duei vegnir promovida.

Festival da linguas minoritaras

Il festival da linguas minoritaras envida mintga dus onns las representantas ed ils representants dad auters lungatgs minoritars al brat da culturas a Glion. Planisai ein gis da festival cun presentaziuns, discuers, films, concerts, presentaziuns da teater e scuvretgas culinaricas. In punct principal schai al manteniment ed alla promoziun dil lungatg e dalla cultura romontscha.

Forum d'architectura Grischun

Retscha d'occurrenzas davart temas actuals e la cultura da baghegiar

Cooperaziuns

Parts da program durant l'emprema "Stad da Glion", jamna da dieta dalla claustra Glion davart il tema pasch

Retscha d'occurrenzas cun presentaziuns e discuers davart temas dallas fracziuns dalla vischnaunca Illanz/Glion.

Svilup dil menaschi

- augment dallas gaschas per artistas professionali ed artists professionals
- indemnizaziun da spensas per collaboraturas e collaboraturs
- indemnizaziun da spensas ed indemnizaziun minimala d'expensas per suprastontas e supras-tonts (pauschal ca. 2'500.-/ onn)

Valurs directivas dalla cunvegna da prestaziun

Prestaziun dil Cinema Sil Plaz

L'uniun s'oblighescha da menar il Cinema Sil Plaz a Glion cun ina purschida multifara, culturala els secturas da kino e tribuna cun concerts, teaters, lecturas etc. In punct specialmein central ei il manteniment e la promoziun dil lungatg e dalla cultura romontscha.

Contribuziun dalla vischnaunca

Summa da contribuziun annuala da 20'000 francs. Sco cunterprestaziun sa la vischnaunca far diever duas gadas ad onn gratuitamein dallas localitads per atgnas occurrenzas (p. ex. vernissaschas, beneventar hosps, presentaziun en pintga rama etc.).

Durada

01-01-2021 entochen 31-12-2025

Controlling

La vischnaunca meina silmeins in discuers ad onn cun il furnitur da prestaziuns pertuccont igl ademplier dalla cunvegna da prestaziun e per analisar la situaziun.

Argumentaziun dalla suprastonza communal

Il Cinema Sil Plaz porscha ina purschida che fuorma ina cumplettaziun ideala tier la veta culturala ulteriura ella regiun ed aschia in argument da vendita exclusiv per Glion. Malgrad la pintgadatad damogna il Cinema adina puspei ei, da carmalar artists internaziunals da num e pum ella regiun che schazegian la casa da cultura persunala ed intima.

La vischnaunca ha grond interess ch'ei dat ina purschida culturala activa ed attractiva el center regional ed el cor dalla regiun turistica Surselva. Grazia alla gronda lavur voluntaria gartegia ei als realisaturs da porscher in menaschi cultural sur onn malgrad mieds en cumparegliaziun fetg mudests.

Proposta

Sin fundament dallas explicaziuns precedentas fa la suprastonza communal la suandonta proposta al parlament communal:

- d'entrar ella fatschenta;
- d'approbar la cunvegna da prestaziun denter la vischnaunca Illanz/Glion e l'uniun Cinema Sil Plaz per la durata 01-01-2021 entochen 31-12-2025.